

## **Z A P I S N I K**

*sa 7.(sedme) sjednice Gradskog vijeća Bihać održane 31.03.2021. godine, (srijeda) s početkom rada u 09 sati i 20 minuta u Gradskoj vijećnici Grada Bihaća*

Predsjedavajući, Zulfikar Handukić, otvara sjednicu Gradskog vijeća i konstatira da je sjednici prisutno 26 vijećnika, napominjući da će se vijećnici Rusmira Konjević, Jasmin Čavkić i Nijaz Malkoč kasnije priključiti sjednici.

Za današnju sjednicu Gradskog vijeća predložen je sljedeći:

### ***Dnevni red***

1. a) Prijedlog Budžeta grada Bihaća za 2021. godinu  
b) Prijedlog Odluke o izvršavanju Budžeta grada Bihaća za 2021. godinu
2. Prijedlog Odluke o sufinansiranju Grada u obilježavanju značajnih datuma s Tekućeg granta za sufinansiranje Grada u obilježavanju značajnih datuma utvrđenih u Budžetu Grada za 2021. godinu
3. Prijedlog Odluke o raspodjeli sredstava za finansiranje i sufinansiranje sporta s Tekućeg granta za sportske manifestacije, utvrđenih u Budžetu Grada Bihaća za 2021. godinu
4. Prijedlog Odluke o uslovima i načinu korištenja plovila na rijeci Uni
5. Prijedlog Zaključka o davanju saglasnosti Gradonačelniku Grada Bihaća za potpisivanje notarski obrađene izjave kojom se daje suglasnost JP Elektroprivreda BiH d.d. Sarajevo Podružnica „Elektrodistribucija“ Bihać za izgradnju priključnog podzemnog kablovskog dalekovoda za TS 20/0,4kV „Lipa 1“ na nekretnini u vlasništvu Grada Bihaća

Predsjedavajući predloženi dnevni red daje na glasanje.

***Predloženi dnevni red usvojen je jednoglasno ( 26 „ZA“)***

Predsjedavajući otvara aktuelni sat.

### ***AKTUELNI SAT***

#### ***Vijećnica Maja Uremović***

U svom izlaganju vijećnica, između ostalog, naglašava da je neadekvatno organizirano zbrinjavanje zaposlenika Doma Zdravlja Bihać i pacijenata. Poziva Gradonačelnika, vijećnike a isto tako i Vladu USK i Krizni štab da se pronađe način za rješavanje ovog problema.

#### ***Vijećnik Armin Amidžić***

U svom izlaganju vijećnik, između ostalog, naglašava da turistička zajednica pravi turistički projekat Garavice u turističke svrhe, te da su dobili sredstva od donatora u iznosu od 35.000,00 KM za pošumljavanje. Naglašava da je potrebno odrediti gradsko zemljište i traži pomoć od geomatara.

#### ***Vijećnik Adnan Lipovača***

U svom izlaganju vijećnik, između ostalog, naglašava da je dobio odgovor na upućenu inicijativu u vezi kladionica. Smatra da je dobio netačan odgovor i traži da mu se ponovo odgovori.

***Vijećnik Nijaz Malkoč***

U svom izlaganju vijećnik, između ostalog, naglašava problem neadekvatnog organiziranja Doma Zdravlja Bihać. Poziva sve da se uvjere u kakvim problemima rade zdravstveni radnici Doma Zdravlja Bihać.

***Vijećnica Šeherzada Delić***

U svom izlaganju vijećnica, između ostalog, izrazila svoju podršku u rješavanju problema Doma Zdravlja Bihać. Traži od svojih kolega vijećnika i Gradonačelnika da sjednice Gradskog vijeća počnu sa radom u zakazano vrijeme.

***Vijećnica Lejla Bakrač***

U svom izlaganju vijećnica, između ostalog, smatra da na svakoj sjednici vijećnici trebaju izaći i izraziti svoje nezadovoljstvo u vezi problema Doma Zdravlja Bihać, kako bi se pokrenulo rješavanje problema Doma Zdravlja Bihać.

***Vijećnik Asmir Budmilić***

U svom izlaganju vijećnik, između ostalog, traži Izvještaj po zaključcima koji su donešeni na vanrednoj sjednici Gradskog vijeća, po pitanju stanju Doma Zdravlja Bihać.

Predsjedavajući zatvara akutelni sat i otvara Sat za vijećnička pitanja i inicijative.

## **VIJEĆNIČKA PITANJA**

***Vijećnica Elvira Selmanović***

1. Traži odgovore na 3 vijećnička pitanja koja je postavila na 5. sjednici Gradskog vijeća, na koja nije dobila odgovor u pisanoj formi.
2. Upućuje pitanje JU Zavod za prostorno uređenje, može li se pomoći stanovnicima u ulici Japodska koji godinama imaju problem sa uličnom rasvjetom?
3. Postavlja pitanje, može li se naknaditi šteta građanima iz ulice Omera Hajama (desni prilaz ulice Radislava Lopašića) u smislu nasipanja puta koji su izvođači radova uništili izvođenjem radova KFW projekta ( inače je ta ulica, skoro u centru Bihaća ne asfaltirana, a građani skoro 10 godina istu nasipaju)?

***Vijećnik Dinko Bećirspahić***

Pitanje upućuje Službi za inspeksijske poslove. Na 47. sjednici prošlog saziva Gradskog vijeća tražio je od resorne službe da izađe na teren po pitanju odlaganja sekundarnih sirovina pored glavnog puta i stvaranju divlje deponije u Grabeškoj ulici, odnosno u mjestu gdje živi romska populacija. Također, isti zahtjev je uputio i Savjet-u MZ Ružica, ali do sada nisu poduzete konkretne aktivnosti po tom pitanju. Želi naglasiti da se na katastarskoj parceli 5888, k.o. Bhać – Grad i dalje, svakodnevno vrši ilegalno odlaganje sekundarnih sirovina i stvaranje divlje deponije. Tu nije problem samo u odlaganju sekundarnih sirovina i stvaranje deponije, nego i aktivnostima koje se provode uslijed razdvajanja i izdvajanja određenih sirovina i utovara istih, a koje se izvode skoro na putnoj komunikaciji gdje nema trotoara i ugrožava se sigurnost pješaka, a posebno djece koja idu u školu. Također, uslijed izlivanja motornih ulja, hemikalija iz akumulatora i sl. na tom

prostoru se onečišćuje okoliš, a kad služba izađe na teren, vidjet će da pored puta stoje tuš kabine i slične neprimjerne stvari koje skrnave izgled te ulice.

Traži da u što kraćem roku služba izađe na teren i preuzme sve neophodne aktivnosti kako bi se spriječilo ilegalno odlaganje sekundarnih sirovina i stvaranje divlje deponije, te da se ukloni sav sadržaj na gore navedenoj katastarskoj parceli. Naglašava, da je ovo zahtjev velikog broja mještana naselja Ružica i Čekrlje.

#### ***Vijećnik Armin Amidžić***

1. Postavlja pitanje, da li JKP „Komrad“ svoje djelatnosti može proširiti novim uslugama otvarajući vlastiti rasadnik? JKP „Komrad“ pored čistoće u gradu zadužen je i za zelene površine na kojima iz godine u godinu vrši sadnju raznih biljnih kultura. Također, grad Bihać gradi svoj imidž na ekološkom, zelenom i čistom gradu i upravo tom imidžu doprinijelo bi postojanje rasadnika u gradu Bihaću. Nema dvojbe da bi pokretanje rasadnika u okviru JKP „Komrad“ bilo samoodrživo te iz tog razloga pita da li navedeno preduzeće planira pokretanje rasadnika u okviru svog poslovanja?

2. Postavlja pitanje u ime stanovnika MZ Privilica, da li se planira rješenje oborinskih voda u ulici M. Fazlića i da li je moguće postaviti rešetke za sprečavanje otpadnih voda?

3. Postavlja pitanje kolegiju Gradskog vijeća i RTV Bihać, odnosno traži informaciju o trenutnom stanju RTV Bihać.

#### ***Vijećnik Hasan Fatkić***

Traži informacije od Gradske uprave grada Bihaća, da u zakonskom roku dostavi informacije o zapošljavanju u periodu od 01.01.2016 do 31.03.2021. godine. Traži da dostave informacije o zapošljavanju za navedeni period po svim osnovama: zapošljavanje na neodređeno radno vrijeme, zapošljavanje na određeno radno vrijeme, ugovor o djelu, stažiranje u navedenim javnim ustanovama.

Informacija treba da sadrži sljedeće podatke:

- Prezime (očevo ime) Ime
- Period zapošljavanja
- Vrsta zapošljavanja
- Školska sprema koju posjeduju zaposleni
- Radna mjesta na koja su zaposleni u važećoj sistematizaciji

Također je potrebno da se brojčano dostavi i podatak koliko je svake godine napustilo Gradsku upravu po osnovu: samovoljnog raskida ugovora o radu, penzionisanja ili po bilo kojem drugom osnovu od 01.01.2016. godine do danas.

#### ***Vijećnik Ahmed Fatkić***

Postavlja pitanje Gradonačelniku, da li Grad Bihać namjerava uzeti zakupninu za korištenje - Đačkog doma „Borići“ ?

#### ***Vijećnik Smail Dervišević***

1. Postavlja pitanje u ime stanara boračke zgrade na Ozimicama I, sa dvije Lamele STO 1 i STO 2 na uglu ulica Mehmed paše Sokolovića i Hasana Kjafije Pruččaka.

Gradnja zgrade je počela 2009. godine i još nije završena. Zgrada ima ukupno 65 stanova.

- Tehnički prijem još uvijek nije izvršen i zgrada nema upotrebne dozvole ( navodno ima privremenu upotrebnu dozvolu)
- Iz tog razloga ne može se sklopiti ugovor niti sa jednim upraviteljem zajedničkih dijelova u zgradi ( nemogućnost održavanja zajedničkih prostorija i problem sa kvarovima)
- Šupe nisu završene te se nema gdje ostaviti ogrjev

- Atomsko sklonište u kojem je voda ( voda je više puta ispumpavana ali se problem nije riješio)
- Okolina zgrade i parking još uvijek nisu završeni
- Stanari su prilikom useljenja napravili zapisnik o nedostacima i oštećenjima ali ih nitko do danas nije otklonio
- Kada će stanari koji su izmirili dugovanja za stan moći isti upisati na svoje ime

Postavlja pitanje, kada će biti riješeni gore navedeni problemi i šta je do sada učinjeno po pitanju navedenih problema?

2. Postavlja pitanje, da li Gradski vijećnici poštuju uslove epidemioloških mjera i traži da se nađe adekvatno rješenje za održavanje sjednica Gradskog vijeća ?

#### ***Vijećnik Nijaz Malkoč***

1. Postavlja pitanje:“ Šta se radi u vezi problema pasa lotalica i traži da se pokrene akcija sa JKP „Komrad“ i sa predsjednicima mjesnih zajednica u rješavanju problema pasa lotalica“.

2. Pitanje upućuje Gradonačelniku, te traži da se izmijeste migranti iz „Sedre“.

3.Pitanje upućuje Gradonačelniku i direktoru Amidžiću, šta je poduzeto po pitanju šišanja grana i živica na Humcima gdje se nalaze spomenici?

#### ***Vijećnik Adnan Mekić***

Upućuje pitanje nadležnoj službi, da mu se dostavi u pisanoj formi registar divljih deponija na području grada Bihaća, te da li za iste postoji program njihovog zbrinjavanja?

#### ***Vijećnik Elvedin Sedić***

Traži od: Doma Zdravlja Bihać, Ministarstva zdravstva, rada i specijalne politike i Vlade USK, da svatko iz svog domena dostavi odgovore u vezi zaključaka usvojenih na tematskoj sjednici koju je Gradsko vijeće održalo u vezi Doma zdravlja Bihać i ostvarivanja primarne zdravstvene zaštite.

U okviru svih prethodnih sjednica od kada je bila tematska sjednica u vezi Doma Zdravlja Bihać i ostvarivanja primarne zdravstvene zaštite na području grada Bihaća vijećnik je tematizirao ovu problematiku i apelirao, posebno na kolege vijećnike čiji politički subjekti čine većinu u vlasti USK da pokušaju u okviru svojih mogućnosti, unutar svojih baza da pokrenu rješavanje ovog problema za kojeg su se na tematskoj sjednici jednoglasno složili da treba biti prioritet u rješavanju. Smatra da je očigledno pitanje većine i skupštinskih „ruku“ trenutno važnije od pitanja zdravlja građana Bihaća.

#### ***Vijećnik Hasan Babić***

1. Nedavno je na putnoj komunikaciji Kostela – Brekovića postavljena horizontalna signalizacija, koja je učesnike u saobraćaju upozoravala na opasnosti duž trase, što je bilo za svaku pohvalu. Nažalost, kako postavljena tako je ubrzo i nestala.

Pitanje upućuje direktoru JU „Zavod za prostorno uređenje grada Bihaća, tko je uklonio i zbog čega je uklonjena novopostavljena vertikalna signalizacija i odnesena u nepoznatom pravcu, te da li će ta signalizacija biti vraćena?

2. U ime mještana i predsjednika MZ Jezero Privilica postavlja vijećničko pitanje, kada će se u ulici Vasif – bega Bišćevića završiti postavljanje, odnosno ugrađivanje kanalizacionih cijevi?

Naime, trenutno je urađeno 80 metara kanalizacionih cijevi, tačnije do zgrade Internata, dok su ostali mještani spojeni na cijevi koje služe za odvod oborinskih voda, gdje na tom dijelu puta često dolazi do začepljenja.

3. Upućuje pitanje JU „Zavod za prostorno uređenje“ i JKP „Komrad“, šta je realizirano po postavljenim vijećničkim pitanjima?

***Vijećnik Edin Felić***

Postavlja pitanje direktoru Elektrodistribucije Bihać, kada će Elektrodistribucija Bihać u MZ Izačić postaviti dvije trafostanice?

***Vijećnica Šeherzada Delić***

Postavlja pitanje u ime uposlenika RTV Bihać, zašto uposlenici RTV Bihać nisu dobili martovsku platu?

***Vijećnik Adnan Lipovača***

1. Postavlja pitanje nadležnoj službi i Gradonačelniku, na osnovu člana 17. Zakona o Vijeću ministara Bosne i Hercegovine, a na prijedlog Ministarstva sigurnosti Bosne i Hercegovine, Vijeće ministara Bosne i Hercegovine u 2019.godini, donijelo je „odluku“ o određivanju privremenih prihvatnih centara za smještaj migranata na lokaciji Đačkog doma Borići u Bihaću. S tom odlukom se određuju kao privremeni prihvatni centri za smještaj migranata. Privremeni prihvatni centri za smještaj migranata iz člana 1. ove Odluke predaju se na privremeno korištenje i upravljanje Službi za poslove sa strancima upravnoj organizaciji u sastavu Ministarstva sigurnosti Bosne i Hercegovine radi smještaja migranata. Služba za poslove sa strancima će koristiti navedene nekretnine u periodu od dana stupanja u posjed do prestanka potrebe za korištenjem tih nekretnina.

Postavlja pitanje nadležnoj službi i Gradonačelniku, da li je donesena odluka na osnovu poslovnika član 154, član 155 i član 156 u vezi donošenja odluke o davanju gradske nekretnine Borići na upravljanje Ministarstvu sigurnosti Bosne i Hercegovine na upravljanje i korištenje. Ako jeste vijećnik traži da mu se dostavi predmetna odluka.

Sve gore navedeno traži kako bi se kvalitetnije mogao odnositi prema informacijama i projektima, prilično je upoznat sa ovim podacima, ali ih traži da se zvanično dostave u pisanoj formi sa statutom Grada Bihaća i poslovníkom o radu Grada Bihaća.

2. U razgovoru sa mještanima MZ Žegar i povjerenikom Altić Željkom u vezi divlje deponije u Žegaru vijećnik postavlja sljedeće pitanje.

„U Žegaru odnosno Žegarskom polju, već godinama postoji problem divlje i nelegalne deponije skoro i zaraze u mjesnoj zajednici Žegar. Traže od Gradskog vijeća da pokrene proceduru kad je u pitanju utvrđivanje vlasništva parcele i postavljanje znakova zabrane za odlaganje smeća. Mještani MZ Žegar traže od komunalne inspekcije i Komrad d.o.o. Bihać da pokrene proceduru da se u što skorijem vremenu ukloni nelegalni otpad sa parcele u Žegaru. U vezi problema koji već godinama predstavlja žarište nelegalne deponije, povjerenik MZ Žegar, Željko Altić je u više navrata organizirao čišćenje. Traže od Gradonačelnika da se uključi u hitno rješavanje ovog problema.“

***Vijećnica Lejla Bakrač***

Traže od direktora JU „Zavod za prostorno uređenje grada“, da odgovori, zašto prilikom postavljanja nove ulične rasvjete u ulici Privilička, nisu postavljene svjetiljke na svaki stub, već je postavljanje bilo na preskok, na svaki drugi ili treći stub, stoga se građani opravdano ljute i negoduju.

Naglašava da je iznenađena neprisutnosti direktora javnih ustanova i preduzeća na današnjoj sjednici, te pita Gradonačelnika zašto nisu prisutni ?

***INICIJATIVE***

### ***Vijećnik Sulejman Kulenović***

Podnosi inicijativu, s obzirom na epidemiološku situaciju u BiH, USK i Bihaću koja je samo nezadovoljavajuća gdje je u proteklih 24 sata pozitivno 1143 građana na Covid – 19 a 92 umrlih, predlaže da Gradsko vijeće hitno uputi zahtjev kako bi Gradonačelnik grada Bihaća postao član Kriznog štaba USK i da se barem jednom sedmično medijski zajedno obrate te iznesu informacije o datoj situaciji.

### ***Vijećnik Hasan Fatkić***

Inicijativa za donošenje odluke o ograničavanju zapošljavanja u Gradskoj upravi Grada Bihaća, Javnim ustanovama i preduzećima čiji je osnivač Grad Bihać do 31.12.2021.godine.

Razlog podnošenja ovakve inicijative je sve manje punjenje budžeta Grada Bihaća kao i javnih ustanova i preduzeća. Također primjetno je da pojedini direktori Javnih preduzeća pored angažovanja radnika kao pripravnika istima produžuje ugovore još 6 mjeseci kao i zapošljavanja na određeno vrijeme više puta po 6 mjeseci.

Gradska uprava Grada Bihaća, Javne ustanova i preduzeća mogu po potrebi da dostave zahtjev Gradonačelniku Grada Bihaća, a koji ako smatra opravdanim, predložiti Gradskom vijeću Grada Bihaća da razmrti i odluči o davanju saglasnosti za neodložan i hitan prijem novih radnika.

### ***Vijećnik Emir Mujadžić***

1. Inicijativa za kupovinu 5 respiratora i uključenje u nabavku vakcina zbog jako teške situacije.

2. Inicijativa za odvoz krupnog otpada kontejnerima po mjesnim zajednicama

### ***Vijećnik Adnan Mekić***

Inicijativa za čišćenje šahtova – slivnika za oborinsku vodu.

Podnosi inicijativu za čišćenje slivnika za skupljanje oborinskih voda u MZ Ozimice I na lokaciji zgrada kolektivnog smještaja L-4/1, L4/2 i L4/3 za koji se uredno plaća parking vinjeta a na istoj lokaciji uslijed kiše se stvaraju velike lokve koje onemogućuju prilaz vozilima na istom, te onemogućuje prilaz privatnim garažama koje se nalaze na pomenutoj lokaciji.

### ***Vijećnik Elvedin Sedić***

Inicijativa za uspostavu registra dijaspore i registra pravnih lica na području grada Bihaća.

Smatra da uspostava registra dijaspore predstavlja nužan korak ka boljoj poveznici između državljana Bosne i Hercegovine, naših sugrađana koji privremeno ili stalno borave van svoje matične države, a koji su i dalje na određen način vezani za nju. Nužno je omogućiti da se svi naši sugrađani iz dijaspore mogu dobrovoljno registrirati putem platforme na web stranici grada, čime bi se stvorio jedan sveobuhvatan registar. U kontekstu uspostave registra, također smatra da bi bilo poželjno osnovati Kancelariju za dijasporu, kao i platformu e-Dijaspora.

Kancelarija za dijasporu će pružati sve informacije i usluge za građane u dijaspori, voditi evidenciju o njihovom broju, organizirati kulturne, sportske i druge vidove saradnje te stvoriti povoljan poslovni ambijent za ulaganje iz dijaspore na području grada Bihaća. Ovom kancelarijom, Grad jača vezu sa našom dijasporom i uspostavlja bolju saradnju i komunikaciju. Kancelarija će građanima iz dijaspore biti na raspolaganju svakim radnim danom i pružće im pomoć, prije svega u prevladavanju administrativnih barijera i procedura radi pribavljanja određene dokumentacije.

Uspostavljanjem interaktivne platforme e-Dijaspora grad Bihać će omogućiti bolju saradnju i komunikaciju, te jačati veze sa dijasporom. Cilj e-Dijaspora treba biti kvalitetna izrada baze podataka fizičkih i pravnih subjekata porijeklom iz grada Bihaća kako bi se napravila poveznica u području očuvanja naše tradicije, kulture, običaja, ali i pokrenula privredna saradnja preduzeća iz drugih država sa lokalnim partnerima. e-Dijaspora treba također omogućiti učinkovit i kvalitetan servis za izdavanje izvoda iz matičnih knjiga rođenih, vjenčanih, umrlih, kao i uvjerenja o državljanstvu iz matičnog ureda. Obzirom da evidencije o broju registrovanih prvanih lica i obrtnika na području grada Bihaća ne postoje, smatra opravdanim da se također uspostavi i jedan ovakav registar pri Gradskoj upravi, na način da se omogući na web stranici dobrovoljna registracija za sve postojeće i zainteresirane pravne subjekte, kao i službena evidencija prilikom osnivanja novih pravnih subjekata na području grada Bihaća.

### ***Vijećnik Adnan Lipovača***

Inicijativa Stranke za BiH Bihać, da „RTV Bihać“ prenosi uživo sjednice Gradskog vijeća Bihać putem vlastitog kanala i putem Facebook stranice.

Smatra da je potrebno shodno postojanju budžetski finansiranog medija, objezbijediti prenose uživo sjednica Gradskog vijeća Bihać. Ovo je moguće izvesti putem interneta ili putem Facebook stranice Radio Bihaća.

Inicijativa se odnosi, da se planiraju dodatna sredstva u okviru Budžeta Grada za 2021.god. Naime predstavnici Radio Bihaća su svakako prisutni na sjednicama Gradskog vijeća i čitavo vrijeme snimaju rad Gradskog vijeća. U slučaju usvajanja ove inicijative postavio bi se samo jedan uređaj za snimanje i uživo emitirao sadržaj zainteresiranim građanima. Da bi se ova inicijativa usvojila potrebno je u Budžetu planirati dodatnih 10.000 KM sredstava za nabavku opreme. Traži od Gradonačelnika da u skladu sa poslovníkom članom 94. stav 1,2 i 3 ovu inicijativu predloži kolegiju Gradskog vijeća za naredno zasjedanje.

Pročitao je Inicijativu ispred Klub-a SBB u ime Kantonalnog udruženje ugostitelja „UNA“: „Povodom uvođenja restriktivnijih mjera od strane Vlade USK-a, te Vlade Federacije, ugostitelji su doživjeli najveći udarac. S toga molimo Vijećnike Grada Bihaća, te Gradonačelnika Bihaća Šuhreta Fazlića da povodom uvođenja restriktivnijih mjera od strane Vlade USK-a, te Vlade Federacije, ugostiteljima Grada Bihaća, Grad Bihać kao vlasnika nad svim javnim prostorima i kao osnivač JKP Komrada i JP Vodovoda, ponovno uvedu olakšicu svim ugostiteljima koji plaćaju javnu površinu u „Nultim“ zonama po 6 KM/m<sup>2</sup> za ljetnu baštu, koju po novim mjerama koriste sa manjim brojem stolova. Nadamo se da će Gradsko vijeće i Gradonačelnik Grada Bihaća, imati razumijevanja, te izaći u susret svojim ugostiteljima.“

### ***Gradonačelnik grada Bihaća***

U svom izlaganju odgovorio je na vijećnička pitanja.

## ***Predsjedavajući otvara raspravu po usvojenom dnevnom redu***

### ***Ad.1. a) Prijedlog Budžeta grada Bihaća za 2021.godinu***

#### ***b) Prijedlog Odluke o izvršavanju Budžeta grada Bihaća za 2021.godinu***

*Izvjestilac - Jasmina Ćoralić – pomoćnik Gradonačelnika za finansije i budžet*

***Vijećnik Zulfikar Handukić – predsjednik Statutarne komisije***

Pravni osnov za donošenje Budžeta temelji na odredbama člana 7. stav (1) i (2) Zakona o budžetima u Federaciji BiH („Službene novine Federacije BiH“, broj 102/13, 9/14 i 13/14, 8/15, 91/15, 102/15, 104/16, 5/18, 11/19 i 99/19), kojim je propisano da budžete donose Parlament Federacije Bosne i Hercegovine, zakonodavna tijela kantona, odnosno gradska i općinska vijeća za budžetsku godinu koja odgovara kalendarskoj godini prije početka godine na koju se odnosi, članu 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj 49/06 i 51/09), te članu 35. tačka e) Statuta grada Bihaća („Službeni glasnik grada Bihaća“, broj 13/15 i 13/18), kojim je utvrđena nadležnost Gradskog vijeća da donosi budžet Grada, odluku o izvršavanju budžeta, te tromjesečni, polugodišnji i godišnji izvještaj o izvršavanju budžeta. Nakon razmatranja predloženog materijala, Komisija je utvrdila da se predlagač u cijelosti pridržavao odredbama člana 26., 27. i 28. Odluke o učešću građana u vršenju javnih poslova („Službeni glasnik Grada Bihaća“, broj 15/17) i člana 143. Poslovnika Gradskog vijeća Bihać („Službeni glasnik Grada Bihaća“, broj 3/16 i 4/20), te je u postupku utvrđivanja prijedloga Budžeta, dostavljen Izvještaj o provedenoj javnoj raspravi. Komisija prosljeđuje predloženi Budžet Gradskom vijeću, kako bi o istom obavilo raspravu i zauzelo konačan stav.

#### ***b) Prijedlog Odluke o izvršavanju Budžeta grada Bihaća za 2021. godinu***

Pravni osnov za donošenje Odluke o izvršavanju Budžeta grada Bihaća za 2021. godinu temelji se na odredbama člana 7. stav (2) Zakona o budžetima u Federaciji BiH („Službene novine Federacije BiH“, broj 102/13, 9/14, 13/14 8/15, 91/15, 102/15, 104/16, 5/18, 11/19 i 99/19), kojim je propisano da se uz budžete donosi zakon, odnosno odluka o izvršavanju budžeta kojom se uređuje struktura prihoda i primitaka, te rashoda i izdataka budžeta i njegovo izvršavanje, prioriteta plaćanja, obim zaduživanja i izdavanje garancija, upravljanje dugom, te finansijskom i nefinansijskom imovinom, prava i obaveze korisnika budžetskih sredstava, ovlaštenja vlade, ministarstva finansija i ministra finansija u izvršavanju budžeta za tekuću godinu, kazne za neispunjenje obaveza, te druga pitanja vezana uz izvršavanje budžeta, članu 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj 49/06 i 51/09), te odredbama člana 35. tačka e) Statuta grada Bihaća („Službeni glasnik grada Bihaća“, broj 13/15 i 13/18). Nakon razmatranja predloženih materijala, Komisije prosljeđuje iste Gradskom vijeću, radi obavljanja rasprave i zauzimanja konačnog stava.

#### ***Vijećnica Lejla Bakrač – zamjenica predsjednika Komisije za finansije i budžet***

Obzirom da Budžet Grada čini procjena godišnjih prihoda i rashoda, a kojim se definišu osnovni ciljevi politike Grada u oblastima iz vlastitih nadležnosti, zatim služi kao instrument ekonomske politike pomoću koje se utječe na razvoj i funkcionisanje lokalne zajednice, te predstavlja kontrolu prikupljanja i trošenja budžetskih (javnih) sredstava, Komisija je stava da organi Grada i svi drugi budžetski korisnici moraju se ponašati krajnje odgovorno, te u tom smislu je obaveza Gradonačelnika, kao odgovornog za upravljanje i izvršavanje Budžeta, da vrši nadzor nad provođenjem, kako Budžeta i njegovog izvršenja,



tako i predloženih mjera koje bi u konačnici trebale dovesti do racionalnog i odgovornijeg korištenja sredstava, te većih prihoda Grada. Komisija je prihvatila obrazloženje predlagača na kojima se zasnivaju predložene Odluke, te iste prosljeđuje Gradskom vijeću, radi obavljanja rasprave i zauzimanja konačnog stava.

***Vijećnik Alen Zulić***

U svojoj diskusiji vijećnik, između ostalog, podržao je predloženi Budžet za 2021.godinu ali traži pojašnjenje: kako pomoći, odnosno na koji način će se tretirati i podržati mjesne zajednice Gornje Prekounje – Bira, Luke, Ripač obzirom da su oni najviše pogođeni migrantskom krizom, odnosno kroz njihova područja prolaze migrantske rute.

***Vijećnik Ahmed Fatkić***

U svojoj diskusiji vijećnik, između ostalog, tražio je pojašnjenje gdje je nestala stavka iz nacarta Budžeta: podrška radu roditeljske kuće „Srce“ centar Duga i Udruženja radost druženja i Udruženja omladine i djece oboljele od dijabetesa. Pita da li se ona stopila sa novom stavkom „Bihać – grad djece“. U svoje ime predložio je sljedeće amandmane:

**AMANDMAN I**

Da se u okviru konta 821600, rekonstrukcija i investiciono održavanje, sa stavke B.4.1. MZ Klokot – Papari (asfaltiranje ulice Pecikovići) od iznosa 50.000,00 KM skine iznos od 15.000,00KM i prebaci na stavku B.2.3. MZ Izačić (asfaltiranje ulice Vikićkih šehida) koja će sad iznositi 35.000,00 KM (20.000,00 KM je učešće Vlade USK-a).  
Obrazloženje: Kako se radi o glavnoj dionici puta u Vikićima, koja se radi evo već više od 10 godina, u koju su mještani uložili u ovih 10 godina preko 200.000 KM vlastitih sredstava, ostalo je još spojiti ovu jednu dionicu puta kako bi isti bio prohodan za autobus, kamion za odvoz smeća, ralice i sl.

**AMANDMAN II**

Da se u okviru konta 614311 (Tekući grant za sport) sa stavke sufinansiranje rada NK Jedinstvo skine iznos od 20.000 KM i prebaci na stavku pomoć vrhunskom sportu, koja će sad iznositi 40.000 KM, dok će na stavci NK Jedinstvo ostati 130.000 KM, odnosno u totalu 170.000 KM.

Obrazloženje: Uzimajući u obzir da NK Jedinstvo Bihać bilježi najgore rezultate u svježijoj historiji ( od posljednjih 10 utakmica doživjeli su 9 poraza, u posljednjih 9 utakmica dali su 1, a primili 18 golova, zadnja pobjeda je od prije pola godine). Uzimajući u obzir činjenicu da u prvoj ekipi NK Jedinstva igra 9 stranaca, pitam se šta i koga mi to plaćamo, jer ovakav rad je doslovno bacanje novca. Ukoliko se u ovom gradu od 60.000 stanovnika ne može naći 5 igrača da igraju u Prvoj ligi FBiH (a ne mogu biti gori od ovih), da li nam treba ovakav nogomet (dajemo novac da gubimo). Suludo je da grad Bihać sufinansira život 9 stranaca koji koštaju duplo više od troška domaćeg igrača, a gube 9 od 10 utakmica. Ako će klub propadati, neka propada sa našom djecom, koju ćemo finansirati, a ne da plaćamo „pojačanja“ iz Gradiške, Bosanskog Novog, Lukavca itd.

***Vijećnik Halil Bajramović***

U svojoj diskusiji vijećnik, između ostalog, istakao je da klub Narod i pravda nema amandmana na ovaj prijedlog Budžeta zato što je već na prijedlogu Nacrta Budžeta istakao da mu nije jasna prihodovna strana Budžeta i zbog toga ne zna ima li osnovanosti ovaj prijedlog Budžeta, a također smatra da je prijedlog koncipiran na bazi predizborne kampanje. Ponovo ističe primjedbe na ostvarene prihode iz 2019.godine koji su ostvareni na osnovu zakona o eksproprijaciji. Smatra da nije dobio odgovor na postavljeno pitanje: “kako se moglo prenijeti 5.5 miliona KM sa JP Aerodrom na Grad Bihać“, također pita;“ zašto do sada ugovor nije predan na Poresku upravu kako bi se obračunao porez“. Ističe dok ne dobije odgovore na ta postavljena pitanja neće podržati Budžet za 2021.godinu.

### ***Vijećnica Šeherzada Delić***

U svojoj diskusiji, između ostalog, istakla je da zajednički stav stranke iz koje dolazi je da ovo treba biti „krizni“ Budžet zato što se kako ona misli nalazimo u kriznoj situaciji, te je predložila dva amandmana:

#### **AMANDMAN I**

Da se odobre sredstva iz budžeta Grada Bihaća za izradu analize i valorizaciju drvoreda u ulici Bihaćkih branilaca u visini od 20.000 KM, te da se sa koda 614311 Gradski sportski savez – NK Jedinstvo – sufinansiranje rada NK Jedinstvo 50.000,00 umanjiti iznos od 20.000,00 KM.

Obrazloženje:

Kao aktivni građani Grada Bihaća i stanovnici MZ Gornje Prekounje, ulica Bihaćkih branilaca, identificirali smo problem u našoj ulici koji se hitno mora rješavati, a radi se o Aleji lipa u ulici Bihaćkih branilaca, prema željezničkoj stanici.

Naime, drvored lipa je proteklih deset godina zbog nedovoljnog održavanja nekontrolisano izrastao do visine i veličine krošnji koje ugrožavaju okolne objekte, prolaznike i vozila parkirana u neposrednoj blizini, djecu koja prolaze trotoarom do škole i saobraćaj na ulici.

Oluci privatnih kuća i objekata kolektivnog stanovanja kontinuirano se pune opalim lišćem, granjem i u vrijeme jačeg vjetra dolazi do pucanja grana koje padaju po objektima. Samim tim iziskuje konstantno čišćenje oluka što predstavlja dodatni trošak građanima za održavanje istih.

Ovim putem tražimo od Grada Bihaća i Gradskog vijeća Grada Bihaća da odobri sredstva iz budžeta Grada Bihaća za izradu analize i valorizacija drvoreda u ulici Bihaćkih branilaca. Napominjem da građani MZ Gornje Prekounje, tačnije ulica Bihaćkih branilaca u kojoj se i nalazi kritični drvored, od 2018. godine pokušavaju riješiti ovaj problem raznim zahtjevima i dopisima prema nadležnim organima.

#### **AMANDMAN II**

Da Grad Bihać poduzme sve neophodne aktivnosti i radnje, te pomogne građanima MZ Harmani na zamjeni postojeće fasadne obloge, kancerogene azbestno-cementne ploče, sa novom fasadom koja nije štetna po ljudsko zdravlje. Zgrada se nalazi u ulici 5. korpusa br.10 poznatija kao H-5, Bijeli neboder. Predlažem da se izdvoje sredstva u iznosu od 20.000,00 KM i to, sa koda 614323 Tekući transfer za parlamentarne političke partije 65.000,00 da se umanjiti za 20.000,00 KM.

Obrazloženje:

Građevinski odbor na čelu sa predstavnikom etažnih vlasnika i Upraviteljem zgrade H-5 je pokrenuo inicijativu još 2018.godine, te se putem tadašnjeg vijećnika Adnana Habibije dana

31. januara 2019.godine obratio Gradonačelniku sa inicijativom da se otpočne postupak zamjene azbestnih kancerogenih ploča. Do danas nisu dobili nikakav odgovor. Uz tadašnju inicijativu predložen je i nalaz Instituta za materijale i konstrukcije pri Građevinskom fakultetu Sarajevo, koji potvrđuje prisustvo azbesta u fasadnim pločama, te potvrđuje da su iste kancerogene i štetne za zdravlje ljudi i eco sistema.

Pored navedenog Nalaza etažni vlasnici su do sada uradili Preliminarni energetski pregled i detaljni energetski pregled za navedenu zgradu, koji su dostavili Gradonačelniku, jer ste isti tražili na uvid.

Radnje koje etažni vlasnici pripremaju, se ogledaju u anketiranju etažnih vlasnika i vlasnika poslovnih prostora, na osnovu donesenih Zaključaka građevinskog odbora, a sve u skladu sa Zakonom o upravljanju i održavanju zajedničkih prostorija i uređaja u zgradi. Tako su vlasnici stanova i vlasnici poslovnih prostora odredili svoje novčano učešće u zajedničkom poslu. Planiraju prikupiti oko 138.000,00KM.

U to su uključeni i poslovni prostori koji su u sklopu zgrade i to: ZZO USK-a, JU Gradska apoteka Bihać, Servis Gorenje, Prostor nad kojim upravlja VF BiH SZP-Odjeljenje za stambeno pravne poslove. Ostaje problem oko prostora koji još uvijek nije iznajmljen niti je u čijem vlasništvu, a ranije je isti koristio „Vijesnik“ Zagreb. Radi se o površini cca 120 m<sup>2</sup>, te prostor koji je u vlasništvu Grada Bihaća od 30 m<sup>2</sup>.

U kontaktu su sa UNDP Uredom u Bihaću, TIKa-om i USAID-om od kojih očekuju pomoć. Napominjem da se predstavnik etažnih vlasnika pismeno obratio sa Informacijom prema Gradonačelniku, Vladi USK.a (Ministarstvo za građenje prostorno uređenje i zaštitu okoliša), VF BiH SZP Sarajevo sa posebnim naglaskom da je postojeća fasada pored zdravstvenog sada i sigurnosni problem, jer su vlasnici stanova imali materijalne štete na automobilima zbog padanja fasadnih ploča i stakla za vrijeme jakog nevremena, a ne isključuje se i opasnost po život stanara ili prolaznika. Zgrada je 46 godina stara i ista je pretrpila teške pogotke granata tokom agresije na BiH.

Svrha ove inicijative jeste da se iznađu novčana sredstva u vidu pomoći koju je djelomično i obećao Gradonačelnik, te da se pristupi zamjeni azbestnih ploča, štetnih po zdravlje i živote stanara ali i svih stanovnika Bihaća.

#### ***Vijećnik Sulejman Kulenović - replika***

U svojoj replici vijećnik, između ostalog, naglasio je da se NK Jedinstvo koje je osnovano 1911.godine ne smije ukinuti, pošto je Klub brend ovoga Grada niti da mu se promijeni ime. Smatra da ga treba novčano podržati.

#### ***Vijećnik Nijaz Malkoč– replika***

U svojoj replici vijećnik, između ostalog, smatra da svi trebaju dati doprinos u vidu novčanih sredstava kako bi se očuvalo NK Jedinstvo, isto tako smatra da treba više djece sa kantona da igra u Klubu.

#### ***Vijećnica Šeherzada Delić – odgovor na repliku***

U svom odgovoru, između ostalog, ističe da nije protiv NK Jedinstva ali je protiv tolikog iznosa novca koji se ulaže u Klub.

#### ***Vijećnik Ahmed Fatkić – odgovor na repliku***

U svom odgovoru, između ostalog, ističe da se ne govori o gašenju NK Jedinstvo odnosno ukazano je na činjenice koje su prisutne u NK Jedinstvo i predložio je da se sredstva sa stavke sufinansiranje rada NK Jedinstvo, prebace na stavku pomoć vrhunskom sportu.

***Vijećnik Jasmin Čavkić***

U svojoj diskusiji vijećnik, između ostalog, predložio je jedan amandman:

**AMANDMAN**

Da se u okviru konta 821600, rekonstrukcija i investiciono održavanje, sa stavke B.6.1. MZ Ripač ( asfaltriranje puta Račićki put) od iznosa 41.000,00 KM skine iznos od 12.000,00 KM i formira nova stavka:

MZ Čavkići – rekonstrukcija puta u Mujadžićima u iznosu 22.000,00 KM ( učešće građana u iznosu od 10.000 KM)

Obrazloženje: Naime, kako se navedena dionica puta sufinansira u iznosu od skoro 50% od strane građana, a posebno uzimajući u obzir da se radi o nepreglednom dijelu puta koji se sastoji od prevoja (kod porodične kuće Suada Filekovića), koji je devastiran do te mjere da je skoro isti nemoguće preći, a da to ne ostavi posljedice po motornom vozilu. Također napominjem da je jedno fizičko lice čija se parcela nalazi uz duž te dionice puta, dalo na raspolaganje 1 metar širine parcele radi uređenja tog dijela puta. Iz tih razloga smatram da je ovaj amandman i više nego opravdan, jer se ovakva prilika i raspoloženje mještana vrlo rijetko vidi i to se obavezno mora iskoristiti. S obzirom da je prijedlog da se skine sa asfaltiranja Račićkog puta koji nema učešće građana.

***Vijećnik Armin Amidžić - replika***

U svojoj replici vijećnik, između ostalog, ističe da u projektu asfaltiranja Račićkog puta učešće građana je u iznosu od 40.000 KM.

***Vijećnik Ahmed Fatkić – odgovor na repliku***

U svom odgovoru vijećnik, između ostalog, naglašava da u Budžetu ne piše da je u projektu asfaltiranja Račićkog puta učešće građana u iznosu od 40.000 KM i smatra ako je to tačno da postoji učešće građana, onda je to potrebno i napisati.

***Vijećnik Edin Felić***

U svojoj diskusiji vijećnik, između ostalog, predlaže dva amandmana:

**AMANDMAN I**

Da se sa Službe za opću upravu i društvene djelatnosti (org.kod 01/7001000), Tekući grant za sport (614311) iz granta Gradski sportski savez – sufinansiranje rada sportskih klubova na području grada Bihaća izdvoji iznos 54.018,00 KM planiran za Grupaciju nogomet i formira nova stavka Gradski sportski savez – sufinansiranje rada nogometnih klubova na području Grada Bihaća, te istoj pridoda iznos od 35.000,00 KM koji će biti umanjen, odnosno prenesen iz slijedećih stavki:

- Gradski sportski savez ( obaveze iz prethodnog perioda) – 20.000,00 KM
- Gradski sportski savez – pomoć vrhunskom sportu – 15.000,00 KM.

Da se sa JU Zavod za prostorno uređenje – u okviru konta 821618 Finansiranje Programa uređenja građevinskog zemljišta ubaciti stavku:

Izrada idejnog i glavnog projekta za uređenje ceste i gradilišta sa cijelom infrastrukturom prema regulacionom planu Ozimice 2- Blok 5, i to iznos od 5.000,00 KM koji će biti umanjen, odnosno prenesen sa slijedeće stavke:

- Gradski sportski savez – trenerska edukacija – 5.000,00 KM

Obrazloženje: S obzirom da zbog nastale situacije sa pandemijom Corona-virusa sredstva namijenjena vrhunskim sportašima koji se takmiče pretežno u inostranstvu i trenerima koji se educiraju, ni u prošloj godini nisu korištena u planiranom obimu, smatramo da je ista potrebno preusmjeriti onima kojima su ona nužna kako bi opstali te nastavili egzistirati barem na dosadašnjim nivoima i razinama.

#### ***Vijećnik Emir Mujadžić***

U svojoj diskusiji vijećnik, između ostalog, ističe da je malo 200.000 KM sredstava za NK Jedinstvo i smatra da treba održati tematsku sjednicu po pitanju sporta i NK Jedinstva.

#### ***Vijećnik Edin Bašagić***

U svojoj diskusiji vijećnik, između ostalog, ističe pad prihoda u Budžetu i smatra da se treba povećati potrošnja turističkih vaučera odnosno smatra da povećanjem potrošnje turističkih vaučera pad prihoda bio bi manji isto tako smatra da treba komparirati rad službe za urbanističko planiranje, građenje, imovinsko – pravne i geodetske poslove iz prošlih godina i sada u vrijeme pandemije. Sugerira da kod pada prihoda poreza na imovinu čiji porez iznosi 5% treba se smanjiti na 2,5 % a drugu polovinu od 2,5 % treba iskoristi za renoviranje istih. Smatra da se treba pregledati svaki dio pada prihoda i da se treba reagirati na isti. Naglašava da je pad neporeznih prihoda uzrok pandemije Covid-19 upravo iz razloga kako smatra da je dijaspora najveći investitor u povećanju neporeznih prihoda.

#### ***Vijećnik Adnan Lipovača***

Između ostalog, u svojoj diskusiji vijećnik naglašava, da je već za Nacrt Budžeta dostavljao amandmane od kojih nijedan nije prihvaćen. Izražava svoje nezadovoljstvo što je kroz Prijedlog Budžeta zanemarena poljoprivreda, privreda, turizam a istovremeno smatra da je velik iznos stavljen na stavku za rješavanje problema pasa lualica. Podržava i poziva druge vijećnike da podrže projekt „Bihać-grad djece“ odnosno da podrže finansiranje privatnih vrtića kako bi mladim roditeljima dali do znanja da želimo da ostanu da žive u gradu.

Predložio je sljedećih osam amandmana:

#### **AMANDMAN I**

Služba opće uprave i društvenih djelatnosti

614311 Tekući grantovi neprofitnim organizacijama

Stavka NK Jedinstvo umjesto planiranih 140.000,00 KM da stoji 40.000,00KM

#### **AMANDMAN II**

Služba opće uprave i društvenih djelatnosti

614311 Tekući grantovi neprofitnim organizacijama

Stavka Roditeljska kuća „Duga Kulen Vakuf“ umjesto 0,00 KM da stoji 30.000,00 KM

### **AMANDMAN III**

Služba opće uprave i društvenih djelatnosti

614411 Tekući grantovi subvencija javnim preduzećima

Stavka RTV nabavka opreme 10.000,00 KM da stoji 20.000,00 KM

### **AMANDMAN IV**

Služba Gradsko vijeće

614300 Tekući grantovi neprofitnim organizacijama

614323 Tekući transfer za parlamentarne političke partije planirano 65.000,00 KM da stoji 10,00 KM

### **AMANDMAN V**

Služba za finansije, privredu i poljoprivredu

614300 Tekući grantovi neprofitnim organizacijama

614311 Stavka sufinansiranje rada NP „Una“ Bihać umjesto 0,00 KM da stoji 50.000,00 KM

### **AMANDMAN VI**

Služba opće uprave i društvenih djelatnosti

614311 Tekući grantovi ostalim neprofitnim organizacijama

614311 Tekući grant za projekat „Bihać grad djece“ podrška u radu vrtića da stoji 100.000,00 KM

### **AMANDMAN VII**

JU“Zavod za prostorno uređenje“

821600 Rekonstrukcija i investiciono održavanje

821612 MZ Vinica – asfaltiranje ulice Ibrahima Ljubovca da stoji 50.000,00 KM

### **AMANDMAN VIII**

Služba za strateško planiranje, upravljanje projektima, komunalne djelatnosti, vode i zaštitu okoliša

614411 Subvencije javnim preduzećima – Finansiranje privremenog skloništa za životinje (program zbrinjavanja pasa lotalica) 80.000,00 da stoji 0,00 KM.

Na kraju iznesenih amandmana je istakao da u sedmom amandmanu mještani navedene mjesne zajednice su voljni učestvovati u finansiranju radova.

#### ***Vijećnik Hasan Fatkić***

U svojoj diskusiji vijećnik, između ostalog, naglašava da iako smatra da je ovo predizborni Budžet ipak je zadovoljan da je ugrađeno asfaltiranje Balića puta. Smatra da bi trebao biti prioritet realizacija dugovanja prema BBI Banci, kako bi izbjegli plaćanje zateznih kamata. Zatim bi trebali krenuti u realizaciju poslovnih zona Kamenica i Ripač, kako bi se na taj način otvorila nova radna mjesta.

#### ***Vijećnik Elvedin Sedić***

U svojoj diskusiji vijećnik, između ostalog, podržao je predloženi Budžet za 2021.godinu, te kako bi građani bili upućeni u sadržaj Budžeta, ističe da su u Budžetu za 2021.godinu predviđena sredstva za poticaje za poljoprivredu, privredu, turizam kao i

stipendije najuspješnijim studentima. Planirana je druga faza gradnje i rekonstrukcije sportske dvorane Luke kao i pomoćnog terena sa umjetnom travom, također je konačno planirano asfaltiranje puta Kamenica – Vrkašić, zatim planirano je zatvaranje kanala Drobinice u naselju Ozimice I i to dionica od mosta H.K. Pruščaka do naselja Harmani. Zatim je planirana izgradnja infrastrukture i zgrade za raseljena lica koju zajedno realiziraju Lokalna samouprava sa Federalnom vladom, isto tako nastaviti će se rješavanje grijanja preko Fonda za energetska efikasnost. Vezano za ranije diskusije naglasio je da je korisnik eksproprijacije JP Aerodrom kao samostalan subjekt, zatim ističe da prema Zakonu o porezu na nekretnine postupci eksproprijacije su izuzeti od poreza na prenos nekretnina.

***Vijećnik Halil Bajramović – ispravka netačnog navoda***

Ističe da ostaje pri svom mišljenju da poreska uprava donosi odluku o oslobađanju poreza, te je potrebno njima predati ugovor kako bi ona donijela odluku.

***Vijećnik Elvedin Sedić – poslovnička intervencija***

Traži od predsjedavajućeg Gradskog vijeća da se poštuju odredbe Poslovnika o radu Gradskog vijeća, te da su se od početka sjednice već desetak puta prekršile odredbe.

***Vijećnik Armin Amidžić***

Između ostalog, u svojoj diskusiji, ističe da je potrebno inicirati odluku o drugačijoj raspodjeli prihoda kako bi i grad Bihać kao i opštine u kantonu Sarajevo mogle oko 50% prihoda ulagati u projekte, zatim predlaže jedan amandman:

**AMANDMAN I**

Organizacijski kod Gradsko vijeće

614323 Da se Tekući transfer za parlamentarne političke partije ukine, a formira novi kod „ za pomoć penzionerima sa primanjima manjim od najnižih primanja“

***Vijećnik Nijaz Malkoč***

U svojoj diskusiji vijećnik, između ostalog, inicira pokretanje projekta za obilježavanje naziva ulica i stavljanje brojeva na kuće odnosno objekte, zatim izražava zadovoljstvo da je u odnosu na Nacrt u Prijedlogu Budžeta povećan iznos za deminiranje i sada ulaže jedan amandman:

**AMANDMAN I**

Za asfaltiranje strane Donji Srbljani: 100.000,00 KM

***Vijećnik Sanel Havić***

U svojoj diskusiji vijećnik, između ostalog, naglasio je da on i njegova mjesna zajednica Pokoj smatraju da je predloženi budžet nekorektan te pita direktora Zavoda za prostorno

uređenje zašto planiranih 30.000 KM u prošlom Budžetu za proširenje mostića u MZ Pokoj, a čiji radovi nisu realizirani, zašto taj iznos nije vraćen u ovaj Budžet.

### ***Vijećnica Lejla Bakrač***

Ispred kluba SBB predlaže sljedeća tri amandmana:

#### **AMANDMAN I**

Sa ekonomskog koda 614400 – subvencije javnim preduzećima izvršiti transfer u iznosu od 100.000 KM na kod 614500 – subvencije privatnim preduzećima

Obrazloženje:

Imajući u vidu da privrednici Grada Bihaća pune ovaj budžet, a znajući koliku štetu je privreda pretrpila početkom pandemije izazvane Korona virusom, tražimo da se osiguraju sredstva u iznosu od 100.000 KM za pomoć najugroženijim privrednicima.

#### **AMANDMAN II**

Ekonomski kod 999999 – tekuća rezerva preusmjeriti za stipendije naših najboljih studenata u iznosu od 30.000, 00 KM

Grad Bihać je jedini u kantonu koji ne stipendira svoje studente od kojih očekujemo da ostanu u našem gradu.

#### **AMANDMAN III**

Subvencija za kupovinu drva našoj najosjetljivijoj populaciji – penzionerima

Tražimo da se sa tekuće rezerve Gradonačelnika, tj. Služba za poslove kabineta i MZ-a, smanje tekuće rezerve u iznosu od 10.000,00 KM i sa sredstava Centra za socijalni rad za jednokratne novčane pomoći od 10.000,00 KM, te da se otvori novi ekonomski kod na JU Centar za socijalni rad za penzionere sa minimalnom penzijom.

Obrazloženje:

Penzioneri sa minimalnom penzijom su najranjivija populacija, uskraćena im je pomoć od strane članova porodice koji zbog pandemije ostaju bez posla i sami nemaju dovoljno sredstava za osnovne životne potrebe.

***Po zahtjevu predsjednika Klubova, predsjedavajući daje pauzu u cilju zauzimanja stavova sa predlagачem o podnesenim amandmanima.***

***Gradonačelnik Šuhret Fazlić kao predlagач Budžeta iznosi stavove o podnesenim amandmanima:***

- Ne prihvataju se amandmani vijećnika Fatkić Ahmeda
- Ne prihvataju se amandmani vijećnice Delić Šeherzade
- Prihvata se djelimično amandman vijećnika Čavkić Jasmina
- Prihvata se amandman vijećnika Felić Edina
- Ne prihvataju se amandmani vijećnika Lipovača Adnana
- Ne prihvata se amandman vijećnika Amdižić Armina
- Ne prihvata se amandman vijećnika Malkoč Nijaza iz razloga što nije naveden izvor prihoda i nije dostavljen u pisanoj formi



- Ne prihvata prvi amandman vijećnice Lejle Bakrač, drugi amandman ne prihvata iz razloga što su već planirana sredstva za stipendiranje studenata, prihvata se treći amandman, stoga pita da li će povući ova dva amandmana

#### ***Vijećnica Lejla Bakrač***

Povlači dva amandmana koja nije prihvatio predlagač

***Predsjedavajući čita amandmane koji nisu u skladu sa poslovnikom pa predlaže vijećnicima koji su ih predložili da ih povuku a to su:***

Vijećnik Nijaz Malkoč i vijećnik Lipovača Adnan.

Predsjedavajući daje na glasanje amandmane koje predlagač nije prihvatio.

#### **Amandmani vijećnika Fatkić Ahmeda**

**Amandman I** „, Dionica puta u Vikićima, odnosno asfaltiranje ulice Vikićkih šehida“, **nije usvojen jer je 10 vijećnika bilo ZA, 16 SUZDRŽANIH**

**Amandman II** „,Pomoć vrhunskom sportu“ **nije usvojen jer je 8 vijećnika bilo ZA, 17 SUZDRŽANIH**

#### **Amandmani vijećnice Šeherzade Delić**

**Amandman I** „,Izrada analize i valorizacije drvoreda u ul. Bihaćkih branilaca“, **nije usvojen jer je 7 vijećnika bilo ZA, 18 SUZDRŽANIH**

**Amandman II** „,Zamjena fasade na zgradi H 5“, **nije usvojen jer su 4 vijećnika bila ZA, 21 SUZDRŽAN**

#### **Amandman vijećnika Amidžić Armina**

**Amamandman** „,Sredstva sa organizacionog koda Gradsko vijeće konto Tekućih trasnfera za Parlamentarne političke stranke u iznosu od 65.000 KM da se preusmjeri za pomoć penzionerima sa primanjima manjim od minimalnih“, **nije usvojen jer je 14 vijećnika bilo ZA, 8 SUZDRŽANIH i 4 PROTIV**

Nakon izjašnjavaanja o amandmanima predsjedavajući daje na usvajanje Budžet Grada Bihaća za 2021.godinu

***a)Prijedlog Budžeta grada Bihaća za 2021.godinu b) Prijedlog Odluke o izvršavanju Budžeta grada Bihaća za 2021.godinu uz usvojene amandmane od predlagača usvojeni su sa 20 glasova „ZA“, 9 „SUZDRŽANIH.***

**Ad.2.**

***Prijedlog Odluke o sufinansiranju Grada u obilježavanju značajnih datuma s Tekućeg granta za sufinansiranje Grada u obilježavanju značajnih datuma utvrđenih u Budžetu Grada za 2021.godinu.***

***Izjavitelj - Elmedin Mehadžić, šef Odsjeka za mjesne zajednice u Službi za poslove kabineta i mjesne zajednice***

***Vijećnik Zulfikar Handukić – predsjednik Statutarne komisije***

Pravni osnov za donošenje predložene Odluke sadržan je u odredbama člana 10. Odluke o značajnim datumima, događajima i ličnostima od značaja za Grad Bihać kao i način njihovog obilježavanja („Službeni glasnik Grada Bihaća“, broj 2/18), kojim je utvrđeno da će Grad Bihać sufinansirati obilježavanje značajnih datuma, događaja i ličnosti za Grad Bihać prema raspoloživim sredstvima koja se planiraju u Budžetu Grada Bihaća za tekuću godinu, a Gradsko vijeće, na prijedlog Gradonačelnika Grada Bihaća, donijet će odluke o raspodjeli sredstava koja su namijenjena za finansiranje i sufinansiranje značajnih datuma, događaja i ličnosti za Grad Bihać, te članu 35. tačka kk) Statuta Grada Bihaća („Službeni glasnik Grada Bihaća“, broj 13/15 i 13/18) Nakon razmatranja predložene Odluke, Komisija traži od predlagača da uskladi naziv materijala u aktu izvjestioca i aktu kojim je utvrđen pravni osnov i razlozi donošenja, sa prijedlogom Odluke koja je dostavljena Gradskom vijeću na razmatranje. Također predlagač je dužan uskladiti pravni osnov naveden u obrazloženju Odluke s pravnim osnovom u uvodu Odluke koja se upućuje Gradskom vijeću na razmatranje. Komisija prosljeđuje predloženu Odluku Gradskom vijeću na razmatranje, obavljanje rasprave i zauzimanje konačnog stava.

***Vijećnica Lejla Bakrač – zamjenica predsjednika Komisije za finansije i budžet***

Komisija traži od predlagača dosljednu primjenu člana 7. Odluke o značajnim datumima, događajima i ličnostima od značaja za Grad Bihać, kao i način njihovog obilježavanja, kojim je utvrđena obaveza nosioca obilježavanja značajnih datuma za dostavljanje godišnjeg programa obilježavanja značajnih datuma, koji u stvari predstavlja osnov za finansiranje i sufinansiranje značajnih datuma, događaja i ličnosti odnosno da predlagač donese Kriterije za raspodjelu finansijskih sredstava po navedenoj Odluci. Komisija prosljeđuje predloženu Odluku Gradskom vijeću, radi obavljanja rasprave i zauzimanja konačnog stava.

***Vijećnik Adnan Lipovača***

U svojoj diskusiji vijećnik, između ostalog, sugerira da se u značajne datume uvrste i datumi 16.04 – dan osnivanja 101. Domovinske pukovnije, 10 .11 – utjelovljenje glavnog stožera HVO-a regije Bihać i 14.01. – godišnjica oslobođanja pod-Plješevičkih sela.

***Vijećnik Nijaz Malkoč***

Između ostalog, iznosi sve pohvale Službi i izvjestiocu za izradu ovog Prijedloga Odluke.

***Vijećnik Hasan Babić***

U svojoj diskusiji vijećnik, između ostalog, sugerira da se uvrsti i datum 25.12.1991.godine, kao dan osnivanja Brekovačkog odreda.

***Elmedin Mehadžić***, dao je pojašnjenje

Nakon provedenih rasprava predsjedavajući predloženi materijal daje na usvajanje.

***Odluka o sufinansiranju Grada u obilježavanju značajnih datuma s Tekućeg granta za sufinansiranje Grada u obilježavanju značajnih datuma utvrđenih u Budžetu Grada za 2021.godinu, usvojena je jednoglasno, sa 28 glasova „ZA“***

***Ad.3***

***Prijedlog Odluke o raspodjeli sredstava za finansiranje i sufinansiranje sporta s Tekućeg granta za sportske manifestacije, utvrđenih u Budžetu Grada Bihaća za 2021.godinu***

***Izjavitelj – Dario Jurić, šef Odsjeka za društvene djelatnosti***

***Vijećnik Zulfikar Handukić – predsjednik Statutarne komisije***

Pravni osnov za donošenje Odluke o raspodjeli sredstava za finansiranje i sufinansiranje sporta s Tekućeg granta za sportske manifestacije, utvrđenih u Budžetu Grada Bihaća za 2021.godinu sadržan je u članu 45. i 54. stav (2) Zakona o sportu („Službeni glasnik Unsko-sanskog kantona“, broj 15/10), kojim je propisano da sportska takmičenja i priredbe (manifestacije, susreti, smotre, igre) organiziraju se s ciljem afirmacije i popularizacije sporta i ostvarivanja vrhunskih sportskih rezultata, odnosno Općine mogu, u skladu sa svojom odlukom, izdvajati sredstva od ostvarenih poreznih prihoda budžeta općine za finansiranje sportskih programa putem sportskih saveza na svom području, te članu 35. tačka jj) Statuta Grada Bihaća („Službeni glasnik Grada Bihaća“, broj 13/15 i 13/18). Nakon razmatranja predložene Odluke, Komisija traži od predlagača da uskladi naziv materijala u aktu izvjestioca i aktu kojim je utvrđen pravni osnov i razlozi donošenja, sa prijedlogom Odluke koja je dostavljena Gradskom vijeću na razmatranje. Komisija prosljeđuje predloženu Odluku Gradskom vijeću na razmatranje, obavljanje rasprave i zauzimanje konačnog stava.

***Vijećnica Lejla Bakrač – zamjenica predsjednika Komisije za finansije i budžet***

Obzirom da se sportskim aktivnostima i igrama unapređuje zdravlje ljudi odnosno istim se postižu sportska dostignuća mladih, Komisija je prihvatila predloženu Odluku uz obavezu da se za utrošak sredstava dostavi Program rada odnosno plan utroška sredstava.

Komisija prosljeđuje predloženu Odluku Gradskom vijeću, radi obavljanja rasprave i zauzimanja konačnog stava.

Kako po predloženoj Odluci nije bilo rasprava predsjedavajući istu daje na usvajanje.

***Odluka o raspodjeli sredstava za finansiranje i sufinansiranje sporta s Tekućeg granta za sportske manifestacije, utvrđenih u Budžetu Grada Bihaća za 2021.godinu, usvojena je sa 27 glasova „ZA“ i 1 glas „SUZDRŽAN“***

***Ad.4***

***Prijedlog Odluke o uslovima i načinu korištenja plovila na rijeci Uni.***

***Izjavitelj – Elvira Hadžić, šef Odsjeka za komunalne djelatnosti***

***Vijećnik Zulfikar Handukić – predsjednik Statutarne komisije***

Pravni osnov za donošenje Prijedloga Odluke o uslovima i načinu korištenja plovila na rijeci Uni sadržan je u članu 6. Zakona o unutrašnjoj i pomorskoj plovidbi („Službene novine Federacije BiH“, broj 73/05), kojim je, između ostalog, propisano da se obala i priobalni pojas na plovnim putevima mogu koristiti u skladu sa odlukom nadležnog organa u Federaciji BiH, odnosno kantonu, općini uz prethodno pribavljenu saglasnost nadležne kapetanije i u skladu sa zakonom kojim se određuju: način, uslovi i vrijeme korištenja, područje obale i priobalnog pojasa koji se daju na korištenje i ovlaštenja korisnika, članu 12. Zakona o lokalnoj samoupravi Unsko-sanskog kantona („Službeni glasnik USK-a“, broj 8/11), kojim je propisano da u vlastite nadležnosti jedinice lokalne samouprave posebno spadaju: utvrđivanje i provođenje politike uređenja prostora i zaštite čovjekove okoline (alineja č), te donošenje propisa o porezima, naknadama, doprinosima i taksama iz nadležnosti jedinice lokalne samouprave (alineja nj), i članu 35. tačka c) Statuta Grada Bihaća („Službeni glasnik Grada Bihaća“, broj 13/15 i 13/18), kojim je propisano da Gradsko vijeće donosi odluke i druge opće akte kojima uređuje pitanja iz samoupravnog djelokruga Grada i daje njihovo tumačenje i alineji i) Statuta kojom je propisano da Gradsko vijeće donosi propise o porezima, taksama, naknadama i drugim prihodima od interesa za Grad. Nakon razmatranja predložene Odluke, Komisija istu prosljeđuje Gradskom vijeću, kako bi obavilo raspravu i zauzelo konačan stav.

***Vijećnica Lejla Bakrač – zamjenica predsjednika Komisije za finansije i budžet***

Kako je članom 28. tačka g) Statuta grada Bihaća („Službeni glasnik Grada Bihaća“ br. 13/15 i 13/18) propisano da Gradsko vijeće utvrđuje politiku korištenja te visinu naknade za korištenje javnih dobara Komisija smatra da su ispunjeni zakonski uvjeti za donošenje predložene Odluke. Također, Komisija je utvrdila da je predlagač u cjelosti prihvatio iznesene primjedbe i sugestije, te da je odgođena primjena Odluke na početak 2022.godine, a što se

neće značajno odraziti na punjenje Budžeta Grada. Komisija prosljeđuje predloženi materijal Gradskom vijeću, na razmatranje i zauzimanje konačnog stava.

Kako po predloženoj Odluci nije bilo rasprava predsjedavajući istu daje na usvajanje.

***Odluka o uslovima i načinu korištenja plovila na rijeci Uni, usvojena je jednoglasno sa 28 glasova „ ZA“***

***Ad.5***

***Prijedlog Zaključka o davanju saglasnosti Gradonačelniku Grada Bihaća za potpisivanje notarski obrađene izjave kojom se daje suglasnost JP Elektroprivreda BiH d.d. Sarajevo Podružnica „Elektrodistribucija“ Bihać za izgradnju priključnog podzemnog kablovskog dalekovoda za TS 20/0,4kV „Lipa 1“ na nekretnini u vlasništvu Grada Bihaća.***

***Izvjestilac – Damir Smajić, Pomoćnik gradonačelnika za urbanističko planiranje, imovinsko-pravne i geodetske poslove***

***Vijećnik Zulfikar Handukić – predsjednik Statuarne komisije***

Pravni osnov za donošenje Prijedloga Zaključka o davanju saglasnosti Gradonačelniku Grada Bihaća za potpisivanje notarski obrađene izjave, kojom se daje saglasnost JP Elektroprivreda BiH d.d. Sarajevo, Podružnica „Elektrodistribucija“ Bihać za izgradnju priključnog podzemnog kablovskog dalekovoda za TS 20/0,4 Kv „Lipa 1“ na nekretnini u vlasništvu Grada Bihaća, sadržan je u članu 109. stav (2) tačka c) Zakona o prostornom uređenju i građenju („Službeni glasnik USK-a“, broj 12/13, 13/16 i 15/20) kojim je propisano da je investitor dužan prije izdavanja akata o građenju, a na ime dokaza o pravu građenja pribaviti notarski obrađenu saglasnost vlasnika nekretnine, te u članu 35. tačka j) Statuta Grada Bihaća („Službeni glasnik Grada Bihaća“, broj 13/15 i 13/18) kojim je utvrđena nadležnost Gradskog vijeća za donošenje odluka o upravljanju i raspolaganju imovinom Grada. Nakon razmatranja predloženog Zaključka, Komisija traži od predlagача da preimenuje predloženi Zaključak, tako da glasi:

„Zaključak o davanju saglasnosti Gradonačelniku Grada Bihaća za potpisivanje notarski obrađene izjave, kojom se JP Elektroprivreda BiH d.d. Sarajevo, Podružnica „Elektrodistribucija“ Bihać daje saglasnost za izgradnju priključnog podzemnog kablovskog dalekovoda za TS 20/0,4 Kv „Lipa 1“ na nekretnini u vlasništvu Grada Bihaća“ Komisija prosljeđuje predloženi Zaključak Gradskom vijeću, kako bi o istom obavilo raspravu i zauzelo konačan stav.

***Vijećnica Lejla Bakrač – zamjenica predsjednika Komisije za finansije i budžet***

Komisija za finansije i budžet, podržava stvaranje kvalitetnijih uslova za isporuku električne energije za potrebe građana i ostalih subjekata u tom dijelu grada, te smo mišljenja

da će se to postići predloženom izgradnjom priključnog podzemnog kablovskog dalekovoda. Obzirom da za realizaciju predloženog Zaključka nisu potrebna dodatna finansijska sredstva iz Budžeta grada Bihaća, Komisija isti prosljeđuje Gradskom vijeću, na razmatranje i zauzimanje konačnog stava.

Kako po predloženoj Odluci nije bilo rasprava predsjedavajući istu daje na usvajanje.

***Zaključak o davanju saglasnosti Gradonačelniku Grada Bihaća za potpisivanje notarski obrađene izjave kojom se daje suglasnost JP Elektroprivreda BiH d.d. Sarajevo Podružnica „Elektrodistribucija“ Bihać za izgradnju priključnog podzemnog kablovskog dalekovoda za TS 20/0,4kV „Lipa 1“ na nekretnini u vlasništvu Grada Bihaća usvojen je jednoglasno sa 28 glasova „ZA“***

Nakon iscrpljenog dnevnog reda predsjedavajući zaključuje današnju sjednicu i konstatira da je sjednica završena u 17 sati i 10 minuta.

Predsjedavajući Gradskog vijeća  
Zulfikar Handukić